

In onn interessant cun blers inscunters

Retrospectiva da la presidenta dal cussegl grond: Elita Florin-Caluori

■ (cp) La sessiun da l'emna passada dal cussegl grond è stada la davosa sut il presidi da la cristiandemocrata Elita Florin-Caluori or dal circol da Razén. Ella haja timunà cun schlantsch ses uffizi e mess «carstgaun e lavur» en il center da ses operar per noss chantun multifar. En in discurs cun *Theo Joos*, pledader da la fracziun da la pcd, ha ella tratg bilantscha. Suandantamain insaquants aspects:

I saja stà per ella in onn interessant cun inscunters spezial. Blers viadis, visitas d'occurrènzas e radunanzas hajan lachà percorscher la grondezza da noss chantun ed augmentà la chapientscha vers las diversas regiuns grischunas.

Il fatg unic che divers presidis, in naziunal e dus chantunals, èn stads l'onn passà en ils mauns da trais dunnas grischunas: *Eveline Widmer-Schlumpf*, presidenta da la confederaziun, *Barbara Jannom Steiner*, parsura da la regenza, ed *Elita Florin Caluori* a la testa dal cussegl grond saja stà in ferm signal per las dunnas che s'engaschan en la politica.

La lavur sco presidenta dal cussegl grond consistia enten timunar la legislativa e la represchentar. Ella haja dentant stuì s'endisar da na pudair far part activamain da las debattas, ma i haja alur sa chapì da sasez.

Sin la dumonda tge muments che sajan stads ils pli bels ha la magistrata respundi: Las sessiuns e timunar il cussegl grond, il contact direct cun il cussegl sco er occurrènzas da sport e cultura, ch'ella haja visità gugenat.



La presidenta dal cussegl grond Elita Florin-Caluori a chaschun da sia ultima allocuziun en questa funcziun.

FOTO Y. BÜRKLI

Il bab da la presidenta dal cussegl grond, a. cuss. guv. Joachim Caluori, ch'è mort en il decurs da l'onn presidial, haja sustegni fitg la lavur politica da sia figlia. Patratgar positiv, s'engaschar constructivamain per ils fatgs e metter l'uman enten il center sajan stadas las valitas communablas da bab e figlia.

Sper la corna da capricorns prendia ella bleras experientschas, contacts ed inscunters impurtants e nunemblidaveils davart la cultura grischuna da quel onn presidial. Ella saja daventada anc pli cunschienta da pudair viver en il Grischun en in grondius ed unic mund muntagnard.